

第六絃溪文鈔

二



第六絃溪文鈔

(二)

黃廷鑑著

王雲五主編
叢書集成初編
第六絃溪文鈔
二冊

中華民國二十五年六月初版

著者 黃 廷 鑑

發行人 王 雲 五
上海河南路

印刷所 商 務 印 書 館
上海河南路

發行所 商 務 印 書 館
上海及各埠

鎮

一二〇七上

第六絃溪文鈔卷三

續資治通鑑長編跋

李文簡公續通鑑長編一書。今世所傳。僅存建隆至治平一百七十五卷。蓋卽乾道所進之本也。其淳熙元年續進神哲以下四朝之書。自元明以來久佚。今七閣所儲永樂大典本。雖缺微欽二紀。而熙寧訖元符兩朝三十餘年事迹。犁然具在。洵爲北宋紀載之淵藪矣。其中分注攷異。詳引他書。而于神哲之代尤多。如國朝會要、政要、歷朝實錄、時政記、王禹偁建隆遺事、王拱辰別錄、司馬溫公日記、王荊公日記、劉摯日記、呂大防政目、呂公著掌記、曾布日錄、林希野史、王巖叟朝論、歐陽靖聖宋掇遺、邵氏辨誣諸書。及諸家傳誌碑銘。皆無一存者。卽幸有傳書。如東齋紀事、涑水紀聞、東軒筆錄、湘山野錄、玉壺清話、邵氏聞見錄、筆談、揮塵錄之類。往往傳寫訛脫。亦足據以是正。則此編非特足以攷訂宋遼二史之闕訛。而有宋一代雜史小說家不存之書。亦可賴以傳其十二。誠溫公通鑑之後不可不讀之書也。第攷異中載有宋史全文、十朝綱要諸條。其書皆出于長編之後。而十朝綱要卽文簡之子李璣所撰。尤不應引入此。或後人有所附益。未可知也。幸逢右文之代。此書殘闕復完。惟是天府儲藏。佔畢之士。得見者鮮。兼卷帙繁重。卽繕抄亦自不易。及門張子月霄。購得閣中傳抄本。不敢自秘。願以公之世。爰以活字版排印全書。亦藝林一快事也。以余稍涉躡史事。畀以校讐之役。自己卯夏迄庚辰秋。凡十有五月而畢。所惜印本易盡。後難

爲繼。倘世有好古之君子。壽之梨棗流傳。俾益廣遠。厥功更倍。願以是舉爲嚆矢云爾。

鄭注爾雅跋

宋鄭夾漈先生注爾雅一書。採經爲證。不事穿鑿。轉得簡要。最稱善本。汲古毛氏得南宋本。刻入津逮書中。俾後學得覩遺編。厥功匪淺。惟中由膝以下爲揭。由帶以上爲厲諸條。因原注佚脫。并節去經文。又以舊文淆訛。有所更定。如𦔻改𦔻。𦔻改𦔻之類。皆失之疎。攷𦔻字。郭注。經典釋文。及許氏說文所引。𦔻謂之𦔻。皆從斗。則𦔻字本不作𦔻。𦔻字。釋文云。𦔻鼠。郭注。關西呼爲𦔻鼠。𦔻音雀。或誤爲𦔻。并以𦔻鼠爲𦔻鼠。又說文云。𦔻。胡地鼠也。與郭注意合。廣雅云。𦔻。𦔻鼠也。則𦔻鼠注本不作𦔻鼠。此皆漢唐舊籍。足可依據。乃毛氏輒將鄭注本文改易。何未深攷也。又如經文葦爲牆。楊鳥爲鷩之類。皆足以正監本相沿之訛。與唐石經。釋文諸書合。茲特補入經文。餘悉仍宋槧之舊。他若怵伏。杭杭。鳴鵠之訛。經前輩訂定者。咸與刊正。庶幾不失舊觀。無誤來茲。于是書不無小補云。

曲洧舊聞跋

漢蘇子卿嚙雪龍荒。圖形麟閣。奇節獨絕千古。得宋朱少章先生而有偶矣。攷公使金被留。其懷印不釋。猶之持節臥起也。閉驛忍飢。猶之置窖絕食也。力抗僞命。誓死不辱。幾鄰于引刀自刺也。及觀置酒與被掠士夫語。寧異武之海上慷慨對李陵時耶。拘囚困苦。歷十有七年。而卒得生還。先生其典屬國之後身歟。何行事之相合也。所著曲洧舊聞一書。述列聖之前猷。溯名卿之往行。卽一二軼聞瑣事。舉足備掌故。

闕遺。身在燕山。而無一言及北國事。其每飯不忘之意。益可見矣。是書曾刻秘笈中。惜非完帙。今得開萬樓所藏舊抄本十卷。爰校以付梓。庶讀其書者。益欽其人云。

庚申外史跋

代

庚申外史一卷。明權衡以制撰。攷以制爲元末隱士。書成于洪武初元。後修元世。詔採順帝遺事。其書會上史館。所載順帝一朝時事。外暨內訌。壞亂傾覆之由。本末詳盡。證之元史多合。惟帝爲瀛國公子一節。與史抵牾。說者以爲微隱難明。或出中原遺老傷故國舊君者爲之辭。誠卓論也。然余應袁忠徹程克勤諸人多信其言。夫晉元之以牛易馬。其說第始于沈約之造奇。而魏收著之以誣南朝。雖有宋孝王劉子元之先後辨誣。而唐初史臣終沿其說。况庚申帝之事。本出當日宮闈之言。丙申之詔。卽順帝亦有不能諱者乎。總之正史須貴徵信。而稗野不害傳疑。在善讀者自得之耳。是書一名庚申帝史。外聞見錄。又有從十五年下分爲二卷者。實卽一書。非有異同云。

明宮史跋

稗史紀錄。間及宮禁瑣聞。止有一人一事。並無專錄成書。蓋緣掖庭邃密。非外朝所得周知。卽有持囊簪筆之臣。不若宦豎左右見聞尤悉也。此宮史五卷。赤隱子從劉若愚酌中志錄出者。若愚爲天啓朝內奄。名麗爰書。人不足道。而其書實創前此未有之例。具見有明一代。太阿倒持。煬竈肆餒。其來有自。不第宮闈之軼聞瑣事。足資攷證已也。詎可以人廢哉。

又跋代

宮史一書。體例略與東京夢華。故宮遺錄相仿。自門垣宮闕之制。內官職掌之目。以及飲饌服飾。嗜好嬉戲之細。無不紀錄。而于內監品秩員數尤詳。夫成周內宰。統于天官。誠以左右贊御之人。繫于主德匪淺。自秦而後。寵任日多。外廷不復統制。北寺甘露之禍。後先同慨。明洪武初。制內官不許識字。立法最善。一再傳後。置東廠。設內書堂。迨至季世。太阿倒持。逆賢擅政。卒蹈漢唐覆轍。良由背棄祖訓。本實先撥故也。我高宗皇帝哀輯四庫。特詔錄存。以著明代亂亡之由。則是編宜攷古者所不廢也。舊板久湮。爰重加校梓。備雜史之一體云。

校正文房四譜跋

此書向無善本。照曠閣刊學津討原時。出舊藏本屬校。謬誤殆不可讀。讐勘再三。粗成句讀。而中如文嵩四侯傳。及墨譜中段溫贈答書狀十二首。不見於他類書。徵引者槩從闕如。緣是錄副未梓。己卯冬。晤錢塘何夢華上舍。云近得鶴夢山房舊抄完本。亟從之借校。今春夢華攜書來。知又新從振綺堂汪氏本校過者。狂喜欲絕。余遂從兩本合校一過。補卷一筆之雜說脫文四十二條。卷二筆之詞賦一條。卷三硯之敘事九條。其餘闕文錯字。約記二百八十餘字。其異同處兩通及存疑者。不計焉。是書至是。可稱完善矣。第未知視敏求記所云絳雲對勘之本。相去又何如也。

校吳越備史跋

吳越備史一書。遵王敏求記云。家藏舊本四卷。忠懿王白乾祐戊申至端拱戊子。終始歷然。無所謂補遺者。又如錦城被寇。命道士閻邱方遠建醮。及迎釋迦舍利建浮圖諸事。今本皆失載。按錢所云。今本卽此明十九世孫德洪所刊本也。今夏間陳子準藏有舊抄善本。假以相勘。書四卷無補遺。敏求記所舉。今刻本失載數事。皆備載無遺。其書與刻本異同詳略處頗多。今皆一一校補。中如紀閻邱方遠之卒。下注方遠事迹。及梁貞明詔敕。脫佚有至一兩葉者。不第如敏求記所云也。書中諸王名字。皆闕而不書。卽嫌名劉字。亦以彭城二字爲代。其爲此書最先之本無疑。惟明刻本第四卷止乾祐戊申。載有嘉祐丙申錢中孚。紹興壬子錢渙兩跋。知此書在宋時已有佚脫。非盡德洪刊刻之謬也。

舊本漢武內傳跋

漢武帝內傳一書。凡太平廣記所錄。及明漢魏叢書諸刻。皆非完帙。向稱汲古閣刊道藏本爲最善。惜傳本亦稀。今春從陳子準處借得舊抄足本讀之。知俗本皆刪節過半。卽毛刻亦多脫落。益見舊本之足貴矣。爰倩表弟陳竹亭影寫一帙藏之。復取宋人續談助中節本。彙諸刻細校一過。間有舊抄訛脫。而他刻得之者。附注于旁。以備參攷。又談助卷末跋中。載有唐道士跋。詳淮南八公姓氏。爲他書所未經見。與玉海中所引合。并錄之。又內外傳本一書。如吳越春秋之例。外傳卽內傳之下卷。自刪本僅存內傳。不知者遂以外傳爲別一書。觀談助跋語自見。然不得此本。又孰從而證明之耶。

重輯漢武故事跋

漢武故事一書。隋志著錄。不著撰人名氏。晁公武讀書志云。漢班固撰。又引張柬之洞冥記跋。謂出王儉所依託。蓋疑而未定也。其書自明以來無完帙。今惟古今逸史本僅存。又錢氏讀書敏求記所載繡林書堂本。今藏稽瑞樓陳氏。假讀之。亦屬刪本。然出逸史外者居半。又于愛日精廬見皇山人姚咨所抄北宋人續談助一書。如子鈔類說之類。中有漢武故事一冊。閱之與繡林書堂本無一字出入。知此本卽從續談助中出者。故亦非完書也。又見太平御覽史記正義及通鑑攷異西漢年紀小學紺珠諸書徵引漢武故事頗多。皆爲今本所未有。爰于暇日重輯一編。以古今逸史與續談助雖非完帙。尙具首尾。據以爲主。而以太平御覽及他書所引諸條約略先後附之。共得三十一條。較世傳本已多一倍。而四庫提要所云諸書中引甲帳珠簾王母青雀茂陵玉腕及柏谷亭事。今本未見者。亦已無遺。計其全書亦十得八九矣。特恨敏求記所載又有陳文燭本未得見耳。嘉慶庚辰夏五拙經叟識。

又跋

余旣輯漢武故事成。及門張月霄示以宋劉雲龍

彙

先生文集中有漢武故事書後

見卷二

云。撰人班周。

世出官次不他見。書中言儀君傳東方朔術。至今上元延中一百三十七歲。元延漢成帝年號也。則周者其成哀間人歟。又云敷敍精緻。雖多誕謾不經。不與外戚郊祀志相表裏者蓋鮮。非西漢人文章不到此。按此說甚新。然余疑周字卽固字之訛。如此書古本果作班周。何以郡齋讀書志及他書所載又皆作固。可知自宋以來相傳之本。只作固字。獨劉所見本偶不同耳。恐未可爲據也。惟所云元延爲成帝年號。而

作者既稱今上。則當爲西漢末人。此說近是。讀范書孟堅傳。永平初。固始弱冠。卒于漢和之永元四年。^十上距漢成之代。已百有餘年。其不出固手。有斷然者。而書中有與浮屠相類。貴施與。不殺生云云。又似出東漢後人語。竊疑此書本成。哀間人所紀。而孟堅修漢書時所嘗采錄者。或因其傳自班氏。遂屬之孟堅。而後人復有附益耳。疑以傳疑。以俟博雅君子論定焉。道光紀元十月下澣又識。

校崑山郡志跋

崑山郡志。元楊諱撰。鐵崖先生敍云二十二卷。今祇風俗起至異事十六門。共六卷。蓋不全本也。竹汀詹事跋云。首尾完具。疑鐵崖所見爲別本。其說非也。地志首重建置沿革。城池鄉都。橋梁水利。戶口賦役。學校官署。壇廟祠宇諸大目。今皆缺而不載。且楊敍中明言崑山自縣升州。地利日增。賦稅甲天下。州縣庸田水道利害所在。而志中絕不及之。其非完帙可知。此第全書之後六卷。幸科第名宦人物。雜記諸卷尙存。足備宋元來是邦之掌故。不以殘闕忽之可耳。琴溪拙叟記。

元本敬齋古今艱跋

武英殿本敬齋古今艱八卷。輯自永樂大典者。爲世間未見之書。道光甲申。張月霄復得士禮居所藏舊抄李氏原書十二卷。首尾俱完。惟十一卷後。即接十二卷終。而誌刊刻年月姓氏二行。疑此二卷兩有殘闕。一失其尾。一失其首。遂誤連爲一卷耳。是書今歸娜嬛仙館。夏月假讀。從殿本逐條對勘。一過始知永樂大典中。亦据此本收入者也。攷是編本傳著有四十卷。想係先時未定之目。迨後定本則爲十二卷。又

抄帙僅存。至萬歷始一刊刻。仍流傳未廣。故自來藏書家皆未著錄。今按殿本八卷。計二百九十二條。見于原本者。計二百二十四條。殿本外增多二百五十五條。其殿本有而原本闕者。僅六十餘條。使全書果爲四十卷。則大典中零篇彙輯。不應于此十二卷中。已得十之八。而于三十卷中。僅得十之一二。以此證之。則大典所收。卽此十二卷之本無疑。其殿本多出之條。卽爲此本十一、十二卷之闕葉。數適符合也。竊念是書自明以來。世無傳本。幸際右文之代。搜輯成編。睿藻褒題。海內學者。始獲覩李氏之書。猶惜其僅五之一。而不無所慊。幸得一旦。原本復出。雖少有殘闕。得大典本補之。遂成完書。并知此書之卷帙。止有此數。而不必致慨于四十卷之亡佚過半也。蓋沈晦幾五百年。至昭代而全書復顯于世。夫豈偶然。衰年目昏手鈍。艱于繕寫。祇取殿本所闕者。按卷錄爲二冊。復卽原書篇次。輯爲總目附後。俾異日可合殿本。依目重錄。以還舊觀。或謹依四庫例。分類成續編。附殿本之末。願以俟後之君子。讀是書者。道光丁亥六月三日。

校刻吳郡志跋

范文穆公繼圖經續記作吳郡志。繁簡得中。嗣後公武。文恪。續有撰著。皆祖此本。然是書毛氏重雕後。板經久毀。迄今毛刻且罕觀。無論宋槧。若雲張君旣刊圖經續記。欲并刊此書。以成合璧。爰卽毛本繕梓。第汲古當日從殘宋本開雕。如牧守題名。卷尾脫一二葉。又書中空文未刊。自一二字至十餘字者。展卷有之。校刊旣竣。君猶以未見宋槧。度置以俟。逮君謝世。尙未摹印。昨秋君從子金吾購得郡城士禮居校宋

本又續得殘宋本數冊。重加校勘。訛者正之。闕者補之。并命君孫^準。据以補刊。惟書中所引。如北海鬪鴨賦。天隨采藥賦。錢儼觀音禪院碑銘諸篇。昔據松陵集。文苑英華。諸家文集是正者。讀宋槧脫誤亦同。蓋此書刊于文穆卒後四十年。當時校官又續有增修。非盡公之初本。迨汲古重刊。更多殘闕。今距汲古又百七十餘年。一旦復見。紹定完帙。俾吾吳文獻。不至久而無徵。君之嘉惠桑梓。功固不朽。而金吾與準之善成先志。亦有足多者已。某昔與校讐。爲識其顛末如此。

老圃秋容圖記跋

昨歲丁酉夏。鄉耆社集圖成。藝齋觀察屬余記之。是秋九月之杪。屆叶鳳龐翁初度之辰。詰嗣炳文。復招諸老爲賞菊之集。因乞芭香別繪老圃秋容圖以介壽。其猶子子方學錄爲之記。今夏四月二日。翁復期集諸老于西郊舟次。三脩社事。雨阻。次日。飲于翁新落之堂。期而未至者。穆堂封翁。皋雲太守。藝齋觀察。伯生大令。續與會者。陸采三明經。賓主九人。飲罷。翁出此圖共觀。并屬余一言。余曰。學錄之文善矣。余何言。翁曰。前湖舫之集。子既有文記之。此烏可以無辭。余應之曰。前記直敘當日事。而未溯丙申之緣始。前記遞詳諸老之年齒。而圖中之坐次布置。闕而未書。今得此文。源委瞭如。按圖諦視。秋容澹淨。晚香寒翠。中諸老之精神面目。歷歷可數。大致本西園雅集。而自出機杼。簡而該。紆而妍。得柳之峻潔。自是圖與文俱傳矣。潞公詩有云。此會誠未有。堪作畫圖看。後之覽是圖者。其庶幾乎。遂書以爲跋。道光戊戌四月。

校正宋本北堂書鈔跋

此書爲岱南閣孫氏所抄影宋本。前有淵如孫觀察序。吾邑蔣君伯生大令得之。願校刊此書。公諸藝苑。以挽鄉先輩竄改之失。誠盛事也。昨歲春。君屬余校勘。商榷體例。并期及蚤藏事。繼復假得瞿子雍明經所藏愛日廬曹棟亭本。及稽瑞樓陳明卿本。二書皆明刻前寫本。遂彙明抱中陳氏刻本合參。三抄訛繆略同。而此失彼得。可以正者。什之一二。餘則取見存之本書。暨近古類書。如初學記。藝文類聚。太平御覽中所引。有可依据者。參互攷訂。又可得什之三四。其無可校者。闕之。迺功未及半。君遽歸道山。私念遽爾中輟。殊負良友之託。兼諸同好敦勸卒業。常圖共襄剞劂。以成君未竟之志。遂矢志一力校竣。以報知己于地下。牽於衣食。作輟間之。至今秋八月。纔草草終卷。蓋距昨春開編之始。屈指再更寒暑矣。歲月如流。人生如寄。幸天假之緣。俾炳燭餘光。竟克償此宿負。既以自慰。又痛君之不及見也。適會詰嗣奇男司馬。奔喪旋里。爰識其顛末。以書歸之。司馬其克成先志。俾虞氏真本。晦而卒顯。得復流布藝林。余幸矣。尙拭目俟之。道光己亥秋九月朔。

抄王介社詩跋

介社王先生。與寶之毛翁。皆先友也。君不永年。余不及見。毛翁自粵東歸。猶得追隨杖履。兩君皆以詩名吳中。而皆無後。全稿未顯於世。聞王稿藏其從子處。秘不示人。毛稿爲其子婦所居奇。舊交後輩。爭欲爲之流傳。而兩家卒不肯出。可嘆也。余廿年前從友人抄得介社詩四卷。半屬揚州以後詩。又于毛翁處見其朋舊雜稿中。君詩獨多。別錄爲補遺一卷。孫子瀟太史曾評選百首。今邑中所傳抄君詩者。皆從此本。

出也。近毛翁詩得趙孝廉閭鄉王上舍蘊香搜輯遺稿爲之刊布。而君詩終晦。昨歲于許丞公伯臧處見吳魏公所抄詩二冊。卷有集名。並識年歲。是從君原稿錄出者。較余昔所抄存多幾及半。亟假歸按年繕錄。其無歲月事實可證者。姑約略編次。共得詩九卷。詞一卷。雖非全豹。亦十得八九矣。倘有好事者。畀之剞劂。與俟竄賸稿。並傳藝林。俾知君當年風流壇坫。清詞雋格。真有江東獨秀氣象。爲虞山詩派中增一作手。有不爭先睹之爲快者乎。道光己亥夏五錄竟書。

書齊民要術後

齊民要術爲隋唐以前僅存之舊籍。其書最爲切用。而久無善本。憶嘉慶初。照曠閣刻學津討原。惟據津逮中胡震亨本。恨無他刻可校。幸元人農桑輯要中所引此書。幾得十之三四。其脫繆之甚者。得據以校改。桑柘篇脫去一葉。亦經掇拾補完。惟是出于後人所引。終非本書。其中文句。保無有增損竄易者。用是至今耿耿于心。今春月霄于鹿城書肆。購得明人單刻本。其卷首序文。雜記已失。疑卽所云湖湘本也。客邸苦雨。取胡本勘之。亦無甚異同。蓋胡本卽從此本出也。同里陳君子準。曾手臨吳門士禮居所藏校本六卷。月霄假以畀余。遂合照曠新刊本。逐條細勘。知農桑輯要所引。與宋本悉合。而凡徵引所未及。可刊落胡刻之脫繆者。復得二十之二三。前後計補脫正文百餘字。注文七百餘字。卷五脫葉文注四百一十餘字。零星羨文訛字。及填補空墨。又得五百一二十字。此書至是始復舊觀矣。惜校宋本缺後四卷。而農桑輯要中。又緣非關民生樹藝者。罕所徵引。無從通校。幸此四卷。舊刻脫誤本少。無害完書耳。竊謂是

書宋刻既亡。傳本久苦難讀。今爲月霄校此兩冊。不第于愛日廬中增一異本。倘將來有好事者。據此重刊。一洗四百年來相承之繆。非爲藝林增一快事哉。余自三十年來。所校古籍不下五六十種。而所最愜心者。惟文房四譜。廣川書跋二書。皆從訛繆中力開眞面。今得此書而三矣。衰年多病。炳燭餘光。矻矻于陳編爛簡中。作一老蠹魚。自笑又自慰也。拙經逸叟書。

書李翰蒙求後

蒙求一書。晁氏讀書志未載。陳直齋書錄解題兩云。唐李翰撰。明顧起綸序。以爲卽昌黎云作張巡傳者也。今四庫提要定作五代晉之李瀚。引李匡乂資暇及五代史桑維翰傳爲證。豈不以匡乂爲唐末時人。距元和時隔六七十年。而去石晉時未久歟。然終有可疑者。攷宋葉大慶考古質疑。引李翰蒙求呂望非熊一條下文。有曰。杜甫。李翰。白居易。皆唐人也。又宋釋文瑩玉壺清話載李瀚事兩條。一云。瀚及第于和凝相榜下。後與座主同任學士。一云。宋太祖擒劉鋹。遣學士李瀚就尙書張昭問俘廟之儀。又王祿燕翼貽謀錄載太宗興國二年。右拾遺李瀚上書切諫云云。則瀚又嘗仕宋。未終于晉也。今以諸書觀之。則資暇所云宗人李翰。自屬作張傳之李翰。桑維翰之傳李瀚。卽仕宋之李瀚。本爲二人。名字亦異。蓋所云宗人者。不過同姓之稱。不必並時。則以屬前之李翰。原不妨礙。若以屬後之李瀚。則瀚作蒙求。更無他證。而匡乂爲唐僖昭時人。旣見其成書。其年齒當亦相近。自僖昭至宋太平興國之初。相去百餘年。而瀚尙爲學士。其可疑一也。且和凝顯于五代石晉朝。瀚旣出其門。後又仕宋太宗。計其人當生于五代之初。似非

匡又所云之宗人。其可疑二也。文瑩、大慶、王祜諸人。去唐五代未遠。其言當非無據。猶今日談勝國事者。不得不以國初人之言爲徵信也。聊記見聞。以附質疑之義。云爾。

季菰耘曰。訂正詳覈精確。小長蘆後。惟鮎埼潛研繼之。先生諸跋。可與頡頏。

書楊五川黃給事傳後

黃忠節公爲明遜國忠臣。事蹟載在明史。國朝乾隆年間。膺詔賜諡表揚。邑人之以死節著者。公爲首。第當日禁網嚴密。諱言其事。後來得稍稍傳播。不致湮晦者。實本楊君此傳之力也。惟五川先生撰述。每喜緣飾以矜新異。故是傳于公大節著矣。而其事之始末。出于傳聞。而未皆實錄。如傳中所記楊潑父子事。及投琴川橋下死之說。前人多辨其失實。故明史本傳。本陸鈺病逸漫記。祇云。明年被召。中途投水死。而不取楊說。有以也。今讀林大同範軒集。集亦久晦。近年始出。知忠節之死。固不在姚善被難之時。而被召亦不在明年。乃在永樂六七年間事也。按林詩病後述懷。其三章云。稔聞帝遷都。扈駕當景從。下云。姪子仕給事。簪筆蓬萊宮。今當侍鑾輿。念親鬱沖沖。又有聞姪叔楊遇寬有詩云。口信遠傳殊可喜。心知有日定非虛。蓋此二詩。皆當公被召時作。故有勸駕之意也。攷明史。文皇卽位。改北平爲北京。營建宮室。卽肇遷都之謀。至七年北巡。遂居之。稱行在。至十九年而定都。此曰稔聞遷都者。則其時當在未北巡之先也。其曰聞姪寬宥者。蓋不以建文舊臣爲罪而錄用之。故云寬宥也。知公之被召。當在北巡之時無疑。蓋公當遜國時。竄伏有年。朝廷久而物色得之。以禮科召用。而公矢志不屈。卒赴水以死耳。按大同于公雖兩姓。實從父。

也。其詩常得其實。林黃一姓詳見別條。又史言以溺水聞。其家得不坐。亦以文皇卽位數年。革除之禁稍寬。若當壬午。癸未之際。恐亦未能免也。以此推之。公之死不在明年益信。蓋同出死忠。不爭先後。唐之張許。宋之文謝。于今爲烈。則公之死節。託諸慷慨赴難而不加增。卽證以從容就義而不加損也。故爲辨正之如此。

季菴耘曰。辨證精核。入後尤圓密。必傳之作。

書洪武蘇州府志後

吳郡圖經。自宋已亡。湖地志者。今惟范文穆吳郡志。及王文恪姑蘇志存而已。顧范志刊于宋紹定。王志成于明正德中。惟盧堯州熊曾于明洪武初撰有府志五十卷。網羅散失。紀載翔實。當時絕重其書。乾隆間。修府志。尙見之。厥後三十年。詔開四庫時。是書已佚。故于明初。惟收無錫縣志。蓋爾時藏書家久鮮著錄矣。緣范志經吾邑毛氏重刊。而是書自洪武初鏤版至今。時幾五百年。宜其傳本之垂絕也。其書自宋端平後。以訖明初。歷百三十年。朝經再易。其間州縣疆域之沿革。水利賦役之利害。與夫官師人物之廢置盛衰。非有是書。則宋元之際。紀載中絕。故攷三吳輿記者。較范志爲尤重。宋文獻序稱。吳中地記。向無完文。此書損益舊典。爲一郡成書。非溢美也。此本錢唐何上舍錫元得之浙中。以贈稽瑞陳氏。後歸恬裕齋。今秋子雍明經鏞出以見示。余爲詳其源委。著其存佚。見此本爲佚而幸存之書。尤爲鎮庫重寶。異日郡志重脩。徵吳中文獻者。舍是編將奚以橐筆從事哉。道光庚子秋九月。七十九叟黃廷鑑跋。

又跋

余昔撰三志補記中元州城攷係友人屈侃父轍作借刻以環山爲城斷自明嘉靖間築城始余向嘗疑之今讀廬志而知其說之果非也據志中常熟縣城圖西有秋報景瞻二門由景瞻而西環山而北至宣化門界畫清晰城內城隍廟三皇殿皆在山麓山上並無寺宇其景瞻門無水門元時爲小西門度其城址是從今城隍廟西由嚴王弄口循石梅白衣庵環半山辛峯亭下趾包三元堂而至平地蓋茲山之勢自西趨東南而止乾元宮極目亭居峯之巔元城不過從山腰環入一角明宏治間城址已夷無界域可憑桑志城圖遂統山頭繪入故乾元宮極目亭如今日之盡在城中矣然按圖中秋報門卽元時景瞻門故址與今之阜成門在西北隅者相遠而城外南境山圖自讀書臺始益可證元城在山惟石梅至三元堂一帶而已其乾元宮極目亭與致道觀嶽廟本在城外屈氏說據張臨江吳文恪詩李氏印帖爲證亦自非謬而不知環山而城實始于士誠特不如嘉靖時城大拓基址包有全嶺耳姚少師詩句山半在城高李文安序稱倚山爲城皆切證也今得據廬志城圖復詳攷其實以釋前疑亦一快事也拙經叟又識

書歸元恭文鈔後

余嘗慨自魏晉以至隋唐其史志所載藝文今存者十不一二此雖由五厄之遭抑或本立言之未至故傳之有永有不永也若夫沈埋既久一朝復顯而又有人焉表章之此必其人之精神誠足以不朽故造物亦不能使之終晦鬱彌久而發彌光良非偶然也崑山歸元恭先生爲太僕曾孫其文章元本家法而能自出機杼惜國初以來學士大夫未有得見其集者婁東季君崧耘購遺文數十篇詫爲僅有手錄之

屬余以遺張鹿樵觀察。以觀察好表章潛佚。且震川全集版藏其家也。觀察素重先生名。讀而善之。謂此吉光片羽。亦自足珍。方擬刊附太僕集後。今春菰耘下榻吾里。趙閭鄉孝廉家。聞鄉復訪得先生之宗裔。藏有詩文稿六冊。亟假繕錄。偕菰耘參互選汰。編爲文六卷。詩一卷。遂據以付梓。至是讀先生之文者。可無遺憾矣。夫先生之爲人。不待文而傳。而人向之景行於先生者。終以不見其文爲嘆。迺是稿之湮晦。幾二百年。不先不後。而忽出於剗劖將事之先。俾由是傳之不朽。此中因緣。非人力所能致。譬之岐陽之石。豐城之金。有精靈潛爲呵護。而若遙相待者。今兩君旣興起於百載之下。爲之蒐討。而余支離一叟。幸得相爲參訂。以副觀察表章前哲之盛心。少陵云。文章有神。洵不誣也。先生之文行卓卓者。已詳前敘。茲卽是集刊布之顛末。著之篇後。

張鹿樵曰。以不先不後立論。善於得間。文亦低徊頓挫。如讀六一集中文字。

書屈侃甫永安耆獻狀後

永安耆獻狀一卷。所載四十人。搜擇詳嚴。敘次簡質。雖里社小志。具有史筆。方之襄陽耆舊。莆陽人物。不
是過也。惟狀中繆侃題處士。尙沿舊志之疎。攷侃于元至正間。值淮兵亂。避地浙東。辟署行省郎中。督漕
運。馳傳歷諸郡。作渡灘歌。見鮑刻玉璞稿時吳越阻絕。父老居虞山。溫清久缺。繪故山雲樹。并所居猗猗堂爲圖。
題曰望雲以寄志。一時名流屬和。見平陽陳高詩序亂定歸。往來玉山草堂。賦詩酬唱。楊廉夫袁子英輩咸重之。見玉
山名勝是侃固嘗膺祿仕。非全輟晦者。其題宜槩正也。又社中尙有應補者。一爲明崑山龔安節。永樂

初避難來常熟。嘗設教于九我堂。陳冲家其讀書寓舍曰鈍庵。在琴水之上。並見吳訥九我堂鈍庵兩記一爲國初江西俞嘉言昌。係前明宗室。鼎革變姓名。隱于醫。遯跡海虞。嘗寓半野堂。後結廬于北山之城麓以終。見錢學士遺事二公皆可循松圓詩老例入流寓。且忠義炳然。匹文苑而更上之也。略撫所見聞。附書於後。續有撰次。或有取焉。

書史通後二條

余少讀史記夏本紀。如羿篡夏。太康中興。一代興亡。缺而不載。而伍員之諫。見于吳太伯世家。夫魏絳之對晉悼。與子胥之諫吳王。俱見左氏傳中。而一載一不載。豈史公當日有見有不見耶。夫左邱失明。厥有國語。史公明言之。故周穆王語諸篇。並載周本紀。桓釐以下。宜及內傳文。而甚略。故有謂史公第見國語。而未見左傳者。及讀史通外篇雜說。論史公稱彌子瑕而不及夙沙衛事。以爲漢初左傳未行。史公故未之見。知此語劉氏實倡之。然余未敢信爲然也。蓋嘗統觀史記列國世家。如吳季札觀樂。魯敗狄于鹹。齊管仲平戎于王。桓公召陵之師。衛孔悝之亂。楚商臣弑君。靈王次乾谿諸事。所載皆全本左傳文。而加點竄。非取之國語。自餘記載各國時事。文異而事合。無大乖繆于內傳者。則謂史公未見左傳也。豈篤論哉。然則史記于左傳。有載有不載者。何也。考漢興三傳並出。第以世尙公穀。習左氏者少。故藏其書者罕。加以簡冊繁多。或如壁中之經。殘闕斷爛。史公所見。未獲其全。所云羿。澆。夙沙衛事。適當其闕。本末未具。故在所略歟。子元論其一節。而未究全書。亦見其疎也。或者曰。左傳一書。本采春秋諸國紀載之史。筆削成。

之。周秦之際。豈無儒生別有紀述。雜取諸國之文爲書者。如晉世家所載屠岸賈。公孫杵臼事。亦出于春秋內外傳之外。史通所謂多取舊記。時采雜說是也。故史公未見左傳。而其書有同于左氏之文者。職是故也。是說也。倘可爲劉氏進一解歟。

又

李陵答蘇武書。漢書不載。文選有之。東坡志林言。劉子元辨其非西漢文。而斷爲出六朝人擬作。見史通雜說云。是篇詞采壯麗。音節流靡。不類西漢人。故有謂其風格近東京人筆者。有謂其詞旨非他人所得僞者。然皆以文體別之。而未究其情事斷之也。案子卿自匈奴使歸後。旣與李陵一再通問已。迺其書中自初降至今日一段。宛似陵敗降後。與漢廷之臣。未一相見。而今始致書者然。而謂以答同在匈奴十九年之子卿。有是理乎。又自先帝授步卒五千一段。自敘戰功。詞旨固悲壯。亦屬贅言。夫陵以力戰無救敗降。史公推其功已暴于天下。以是獲罪。此在漢廷諸臣。人人能道之。曾謂陵與子卿素相知者。而復爲是聒聒不已乎。究之不過脫胎史公報任安一書。然視史公文。縱極怨憤。而骨幹自厚者不侔。子元之論是也。而或因是并疑選中蘇李詩。則又過矣。

季菰耘曰。讀書慣於閒冷處著眼。自能羽翼前人。獨闢覲見。

書手抄中吳紀聞後

中吳紀聞一冊。余于嘉慶初。從毛刻影寫。惜無善本可校。置之篋卅年矣。昨歲以贈張茂才。樹本今夏茂

才持其婦翁家園公太史藏本屬校。係顧伊人臨校藁竹堂盧氏元稿。亟取對勘。補卷六翟超一則暨脫文數處。餘是正者八十餘字。未幾。又假得友人季菰耘傳臨毛斧季刊後校本。同出文莊舊抄者。覆勘之。除顧校標出外。復拾補遺漏幾二百字。兩家同据祖本。而所校詳略不同。蓋顧有區擇。而毛務兼收。加以几塵風葉。非一覽可盡也。噫。是書自有嘉靖坊刻。而汲古仍之。近照曠刊于墨海。長塘刻于叢書。皆非盧氏元藁。蓋承訛者幾三百年。幸有傳校之本未絕。一朝併出。始得合訂。以還公武所傳之舊。洵乎文章有神。非偶然也。余年始壯。從事丹鉛。每喜手自抄寫。今及耄矣。自笑老至不知。目昏手強。不憚一再校讐。而昔抄遂成善本。倘異日者。有據之授梓。以掃自來傳本之訛。俾士林得睹廬山真面。不亦增三吳文獻之光耶。校竟。書此。并質之茂才。以共欣賞也。道光己亥七月。

書校建康實錄後

建康實錄一書。略仿通史體例。括六朝興廢。簡詳典要。自昔推重。而傳本絕少。方照曠刊學津討原時。聞邑中有虞巖魚氏鈔本。物色之。秘不肯出。後數年。吳門黃氏得從汲古宋刻鈔本。有人借刻未半。而歸版與書于張氏。續刊完書。卽此本也。其魚氏本。後輾轉歸余。及門俞用賓處。今歲余館照曠宗人子慎茂才家。茂才假以屬勘其家刻。此本向曾爲陳子準、吳心葵兩君插架。俱經略校一二而未卒業。吳校首二卷。陳校宋略總論。余迺取吳志、合晉、宋、齊、梁、陳五書。及南史。并魚氏舊鈔。通勘一過。始知新刻出自長洲顧澗齋校本。較舊鈔轉勝。然除顧氏校補外。脫訛尙多。如吳中見一人操彈佩丸。咸以爲是。脫是字。太子登傳。晉上雖有不軌之

名。名誤者。

周嵩傳

晉中夏五月詔全除一年租布。其次聽除半年。布其次三字闕。

寧康二年

後軍文武盡配軍府。

盡誤書。

謝安傳

勸彬謝彬曰。脫彬謝二字。

王彪之傳

晉下遂邀殺毅等同舉義。誤衍殺字。

何無忌傳

宋上海鹽令鮑

陋。脫令字。

高祖紀

戊子大赦天下。導于天子爲從父。脫下導于天四字。

同上

宋下梁獠請內屬。以爲懷漢郡。懷

漢二字闕。

大明元年

始壞士族雜婚者補將吏。壞誤懷。

大明五年

宋下魏拓拔燾與質書曰。曰字上脫燾書及攻盱

眙事。下童謠云云。乃質答書也。

臧質傳

草未及燃。脫燃字。及尋陽敗。脫敗字。

蕭惠開傳

齊上衆二萬發濫口。脫發

字。

高帝紀

復屬籍。各封子爲侯。各誤冬。

建武元年

東昏以卷名。名誤矣。

史臣曰

齊下詔贖錢五萬。詔誤顚。

蕭赤斧傳

南門

一。

魏處

有索于水。出定襄。脫出字。

同上

氏凡五字。一誤外立二十。闕土字。誤作十王。一誤氏。餘皆誤元。百頃。

頃誤須。

同上

梁上又撰通史。躬讚序。躬誤聘。

武帝紀

梁下其夜遁歸襄陽。遁誤遣。

蕭齊傳

陳下王勣爲右僕射。王

勣二字闕。

光天三年

以上皆文義乖繆。可据史文訂正者。凡二十餘條。其餘形聲字誤。及訛闕而無可參證者。

俱悉注出。又得六七十處。雖未敢云盡善。視顧校少加精審。亦可十得八九矣。自初冬至近臘。攤書滿几。

彌月而畢。竊喜完二君未竟之功。惟書中脫簡數葉。非得宋槧完帙。無由臆補。未知世間尙有傳本否也。

道光庚子十一月下泮書。

書縮寫元大德刊本白虎風俗二通後

余向聞白虎風俗二通。有元刊大字本。嗣于嘉慶初。得見吳門士禮居所藏本。而風俗通已失。心耿耿者四十餘年。去秋聞吾里瞿子雍明經得此二書。欣然挈舟造觀。并假歸。攜至寶閒書館。子慎主人見之。驚

爲希有。爰命仲子。縮寫巾箱本行款字數。及漫漶殘闕字畫。悉仿摹寫。諸序之行草書。手自臨撫。惟恐失真。譬之人形體不同。而精神面目。惟妙惟肖。觀者幾咤丈人之化侏儒也。此大字本。其脫誤雖與明刻無甚異。而班書篇目舊第未改。書中八妾於皇明周之類。善者盧氏校勘已著之。不復論。應氏書世尤罕見。中孟某條。出畫字三見。而未作畫。考孟子趙注。本作畫。後人傳寫訛畫。朱注亦云當作畫。音獲。想應氏書本皆畫字。此葉適明人補刊。遂改爲畫。而改之未盡。留此一字。猶足顯元本之善。昔人惟據史記王蠋畫邑人。以辨其訛。今得應氏引本書證明之。迺爲更確矣。餘如青菁。執諄。哲誓。京原。古書通假字。後人嘗爲訛謬者。皆可據此本正定之。益信元刊之勝俗本多也。噫。古刻日亡。子雍之通假。子慎之愛古。其志洵堪嘉尚。而余更幸元刊之得重度一種子也。寫竟。屬校。遂書其顛末于後。道光辛丑九月。

書先節孝祠記後

吾黃自慎。吾公遷虞後。有二支。長曰汝弼公。諱家相。季曰汝石公。諱家柱。鑑長房之八世孫也。吾祖漢昇公。客游京師歸。貧無立錫。遁跡窮鄉。城中族姓。遂不相往來。家君早年失怙。中罹回祿。先世譜牒遺籍。盡爲灰燼。幸有先高祖圖冊一裘。藏伯父金山公家。始得悉家世源流。及節孝始末。微此幾不識先代諱氏矣。汝石公再傳爲來仙公。兩世以孝稱。其事具載邑乘。惜公之嫡裔莫攷爲誰。嘗謂公之積善成德。宜獲後嗣之報。而子姓之伶仃。可重嘆也。今夏讀陶太史退菴先生文集。得覩先生爲吾邑先世節孝祠記。記言祠在西城外。基狹而制朴。諄諄乎創之難。而欲其傳之久。乃今未百年。爲子孫者。已莫識其基址。將有

遺蹟可尋歟。抑興廢有時。時當其廢。不必盡如先生所云。亭臺池館之盛者耶。然祠宇雖經湮廢。而藉先生之文。傳之記載。俾先世之節孝。與來仙公創祠之苦心。猶得識其梗概。不又重可幸哉。且丐記者爲來仙公之嫡系。則向疑公之宜必有後者。今而信公之果有後也。爰乞先生文孫約齋廣文。補書此記于圖冊後。以爲家珍。倘異日者。兩支子姓。重敍昭穆。同登邱壟。始睽者得終合。此則吾族之厚幸也夫。嘉慶丁巳六月朔。長房八世孫廷鑑謹識。

盛蘭雪曰。明白如話。簡當不支。此種題固當如是。無所用其繁飾也。

再書先節孝祠記後

鑑旣書祠記後之九年。得交張君子恂。子恂好古彊識。愛搜訪古蹟碑刻。尤熟于邑中故實。去歲自中州歸。語及吾家先世。祠墓湮沒失攷。時子恂同邑之紳士。修復明忠臣邑令王公墓。委里胥周伯和經紀其事。遂語鑑以家祠屬訪焉。伯和世居城外一都。凡繞山之麓。祠宇冢墓基址。能悉其興廢。越數日。子恂來述伯和云。得祠于西郊。蔣贈公墓右。偕往省謁。雖垣宇不葺。而規模仍昔。陶太史記所云。壁間陷置之石。尙完好可讀。并詢得祠旁之祖塋而肅拜焉。憶先墓之失攷。先君歷五十年訪問不獲。鑑粗有知識。卽命繼爲求訪。又閱卅餘年。今始得識其處。而祠墓依然。不至鞠爲茂草。弃諸他姓。實賴來仙公之嫡裔。猶有存者。今卽式微已甚。前所書重敍昭穆。同登邱壟之言。適符左券。此皆先靈默相。累世節孝之光。有不容泯。而假手于子恂。伯和兩人。爲之作合。嗚呼。此豈鑑一人之幸哉。所痛者。方擬今歲春和。先君得扶杖西

郊。率鑑祭埽。以展數十年之積慕。而二月初。先君遽捐館舍。竟不獲一拜墓。下此。又鑑所爲執筆屢廢。飲泣而不能已者也。爰重綴其事于記後。藉以識先君孝思之篤。並詳述其詢訪之艱。示我後之子孫。庶幾永保弗替云。時嘉慶丙寅重陽後三日。

盛蘭雪曰。敘述簡而賅。意義真而摯。藹然孝思。溢于言表。能不令人肅敬也。

第六絃溪文鈔卷四

趙先生墓誌銘

先生姓趙氏諱同翮字振六自號巢寄明文毅公八世孫也祖友倩隱于醫父森以孝廉官中書有才名先生生而穎異幼受經于大母王太宜人卽通大義少長從同里許德園先生游學益進規言矩行以古人自期爲文根柢經史弱冠補諸生試輒高等文行推譽序冠中書公卒于京邸貧無立錫以教授自給邑令康公基田稔其貧餽以白金先生辭不受其廉介蓋天性也乾隆三十年舉于鄉明年赴禮部試不中考充咸安宮教習三年期滿選授甘肅徽縣知縣縣故天水地其俗男無鰥居女寡輒嫁沿習成風先生以文學飾吏治導以節義首禁革之民風一變邑鮮讀書數十年無一領鄉薦者先生創設書院擇士之秀者肄業焉資以膏火親督教之越三年有張君綬以鄉舉成進士選庶常由是徽之人士爭知向學庠序彬彬矣時西監例開准商民輸粟用本色給實收儲以備賑卽古納粟備邊遺法也而官吏因緣爲奸改收折色入私囊詭造賑戶報銷甚者預給空照轉相鬻買飢民無一實惠大吏亦從中納賄知而不問先生莅任五載未嘗給一空收歲偶歉寮吏咸擲揄之先生不動聲色先捐廉爲倡繼勸富民量力出資設粥賑飢並未一請公帑民無死者方是時也仕宦者皆視甘省爲金穴雖賢者不免後冒災事敗上自撫藩下至牧令駢誅者數十人子孫有發遣禁錮者而先生獨嶢然不滓可謂特立獨行者矣制府李

公特奏廉能。量移張掖。地當孔道。星輶絡繹。先生節冗費。輕徭賦。敝衣羸馬。躬自調度。不假手胥吏。大吏過者。咸知趙令賢。戒從者毋敢擾。訟簡政平。張人德之。頌爲河西第一清官。甘州守某。嘆先生不善逢迎。故爰假鞫案。失出揭之。先生遂拂衣歸。張人羣詣提督軍門某。懇奏留。某以武臣辭。衆環叩不已。許轉白制府。迺散去。顧以官逋未能卽行。民爭釀金代償。不旬日集事。旣交代。有少贏。民諄請資爲途費。先生辭不獲已。受之。而中未愜。途中賦詩有云。兩袖清風真浪語。脂車猶出舊民膏。蓋自訟也。兩任巖邑。歸裝敝衣數襲。破書一簞而已。旣歸。僦屋以居。仍以教授自給。先生從父官福寧守。歿于任。治其喪葬。遺孤尙幼。先生教育之。生平敦本好義。常若不及。故所入修脯恆不給。或至晨炊不繼。處之泊如也。中表季綱齋。時爲河東運使。郵贈百金。先生不謀朝夕。亟于先塋上建墓門。樹綽楔。不令餘一錢。罷官家居者十年。從游益衆。凡經親炙指授者。文行皆可觀。先生生于雍正十一年某月。卒于乾隆六十年某月。享年六十有三。元配徐孺人。早卒。繼徐孺人。皆未出。妾王。生一子元運。以某年某月某日。祔葬于西鄉小義橋先塋門下。士某爲之銘曰。

世溷溷兮我獨清。衆昏昏兮我獨醒。非精于義而辨早。曷克完其素而保貞。秦州之塞。天山之陰。清風惠澤。孺立頑廉。

孫子瀟曰。通篇以廉介二字爲綱領。敍次詳略得宜。前後自爲章法。今之諛墓文多矣。惟此文可謂無溢美。惟趙先生于此文當之無愧色。

王先生墓誌銘

先生姓王氏諱庭筠字養吾自號無黨世爲常熟人祖慶祥父永錫兩世潛德未曜先生生有異稟讀書目數行下年十八補縣學生時崇川柏太史東皋先生掌教虞山爲文章宗匠見先生文亟賞之遂游門下文益進東皋高弟先生與二山何君稱首焉乾隆三十年膺選貢入都廷試二等就職州倅入監肄業司成朱春圃以國士目之延之課子兩試京兆不售庚寅以方略館謄錄議敘分發粵西試用委署永康州事郡守劉君檄會審命案先生反覆研鞫得其實一夕上之劉歎曰初任辦案如老吏君眞善讀書人明年春補西隆州州同分駐八達地處邊瘴漢苗雜處獷悍不馴號稱難治先生以清勤自勵開誠布公興利除害三月苗民無梗化者委署本州事州地亘九百里舊分爲六甲凡州牧蒞任孤甲差六人總甲一人盤踞村寨至土人長跪白事婪索不遂輒用非刑凌虐先生於八達旣革去差頭而甲差非所屬每以爲恨至是始罷去之州官出巡俗有過山錢徵索土產官吏藉以爲奸先生只從吏役四五人攜襍被糗糧自給土酋以何首烏饋却之攝州九月苗民懽感詫爲未有州地有馬蚌土人爭山場八達有大寨與葉英寨爭地界連年不決先生馳往皆一勘而定八達東門外有八陽渡渡夫恣爲勒索行旅苦之先生捐俸置船月給工食其弊遂絕署州時有吏目危某恃有夤緣貪穢不職戒之不悛先生揭之上游多爲之地先生逕稟撫軍危褫職去而先生亦病矣明年先生病假旋里杜門七載四十年春以病痊起復再任西隆州州同州人聞先生復至黃童白叟懽呼來迓接踵于道先生一如前政昔年弊政去任後漸

復者。仍嚴革之。先生常言。凡今牧令多諱盜。顧一己處分。而貽地方無窮之害。是民賊也。會八達所屬八索。冷水二寨。兩月中疊次報盜。先生皆親勘通稟。而州官及府交恨之。冷水獲盜首。已審實。屬令翻供。時藩司瑞某護撫篆。將以誣逼爲先生罪。已定稿。會新撫吳公垣至。見之。歎曰。王淬雖有誤。然肯報盜。是一正人也。事得寢。明年病又作。慨然曰。吾少讀陽明先生瘞旅文而悲之。今奈何躬爲吏目之續耶。且一倅之職。惠之及民者小。而又動見齟齬。鬱鬱居此。甚無謂也。遂復告歸不出。先後在西隆六年。慈祥而精敏。遠宦數千里。不挈眷。不攜僕從。一肩行李。吏民初不知爲官也。兩攝州篆。不設門丁。絕苞苴。屏慶宴。署惟蒼頭一二人。司爨火。終日堂皇。呈狀立判。兩造俱近者。卽時訊決。訟無淹滯。初署州篆。曾延幕賓。自後一切謝去。事出親裁。而吏無所容其奸。自奉儉約。有寒士所不堪者。故能潔己而辦公無紕。先生之廉能。當于古人中求之。惜乎未竟其用也。又嘗言甲差不除。西隆必反。聞者咸未信。先生歸後數年。西隆果有猓獬亭龍登連激變滋事。致煩征勦。先生之言始驗矣。先生之論文也。以先正爲宗。與及門講解。輒矜不倦。人有寸長。譽之不置口。有一不善。面責隨之。朋儕中行止偶有不檢。擯不與通。故人多以怪目之。先生聞之不屑也。先生猶子曰家相。伯兄以貧老故。思棄儒業。先生初任粵西歸。識其有造。亟命之讀書。躬自教誨之。越歲。卽游于庠。後成進士。入詞館。今官御史。先生力也。先生生于雍正七年正月某日。卒于嘉慶二年七月某日。年六十有九。著有懷蓼堂詩文七卷。制義三卷。粵西從宦略一卷。藏于家。元配凌安人。前卒。子二。長元晉。諸生前先生一年卒。次元鼎。後先生卒。以家相次子憲成爲元晉後。先生葬逾廿年。而誌石

未備。門人某謹輟次其略而銘之曰。

道何以隆。直則不汙。位不在大。誠則自孚。安隆一隅。昔稱犢悍。鋤姦植善。德懷威憚。勵之以廉。濟之以明。執簡御煩。政平刑清。卓哉先生。含章中美。沈淪一倅。設施止此。虞山之陽。琴水之濱。風清道古。矯矯千春。孫子瀟曰。養吾先生政蹟行誼。真古之人也。文敘得詳明有法。後人可據此采入循吏傳。先生藉以不朽矣。

婁東明經張君墓誌銘

余賦性迂拙。落落寡合。歷數知交。得心契者三人焉。一爲同里屈侃甫。一爲婁東盛子履。一爲婁東張椒卿。三人者皆不遇。侃甫浪游都門。困而返。子履以一廣文滯淮上。而椒卿則於昨歲死矣。葬後三年。其子以誌石請。不敢以不文辭。君諱鐸。字椒卿。一號春廬。太倉毛家市人也。祖應祖。諸生。父健鵬。隱居教授。兩世潛德未曜。君生而穎異。周歲時。祖日課字數十。輒不忘。時尙未行立。迺粘于屏壁。抱于懷中。溫習之。少長就塾。所受書皆如夙誦。鄉里有神童之目。十齡。畢五經。繼治古文騷賦。能于前人。轆葛處出新解。每發一言。老宿驚服。爲制藝操筆。已成章。後受業蕭百堂先生。業益進。年十七。補縣學生。明年壬子。赴省試。文極瑰麗。本房阮昉巖先生。激賞爲才人之筆。力薦不售。阮公深爲惋惜。甲寅。中副車。自後歷試不遇。而君亦遂以文酒自放矣。家貧。恆客授于外。阮公任宜興。在其幕中最久。繼館婁之直塘。于吾里則墨井言氏。西城張氏。南墅席氏。嘗卜一廬于虞山之麓。繼又徙于東城下。名中東草堂。然終歲常虛局。居停無幾。

日也。歲丙子。薄游霅溪。謁同年湖州守趙蓉湖先生。先生深加推挹。延課其子。辛巳秋。忽患肝鬱之疾。忿躁氣逆。平昔嗜飲。而飲輒喘。君復強之。病益劇。明年二月。強起赴蓉湖寓館。旋歸。歸五日而遽不起。傷哉。君博聞強識。詞華富贍。朋儕罕有其偶。工詩古文樂府。而尤長于駢體。其用典也。鉤新擢異。無一庸近語。博麗瑰奇中。能排宕流轉。一洗迦陵善卷之習。不輕爲人作。作必蘄勝于人。凡求其文者。速則操紙立就。遲則經歲不獲。間爲集文選體。截肪萃腋。巧若天成。君頗自喜。然非其至也。憶君客授虞山時。值君里蕭子山。王雲門。盛子履。張補葦。孫少初諸君。咸館吾鄉。又皆一時才雋。流連詩酒間。旬日一敍。而君與子履迭爲之主。余因得介子履以交于君。維時吾里屈廣文侃甫。闢享帚山莊于北麓。與君寓鄰。月有文酒之會。座客如吳頊儒。郭小若。吳心葵。程醒雨輩。皆願交于君。余遂介君以往。懽如舊識。暇輒過從。每見君酒酣耳熱。上下古今。雄談偉論。時露其抑鬱不平之概。而侃甫心葵。議論風生。往復辯難。相與抵掌歌呼。極一時友朋之樂。未幾。君往霅溪。醒雨秉鐸廬江。小若客死河南。心葵避居無錫之梅里。而君里諸君。亦復星散。余方悵昔游之不再。而君又死矣。君懷才負氣。不善攝生。生平又半在羈旅。侘傺無聊之槩。時時見諸形色。卒年纔四十有九。子一詢之。余培也。易簣之夕。忽與之講檀弓童子隅坐執燭句。而斥新說以隅爲童子名之謬。蓋了了于去來之際。而微示其意。時道光二年三月之晦也。配葛夫人。先卒。終身不復娶。一生不問生產。所至交其賢豪長者。貧而好施與。見齷齪鄙瑣之輩。輒詆呵之。居吾鄉時。有君里王小香。客死于虞。君爲經紀其喪。俾之歸葬。孫少初死。君在茗上聞之。轉貸數金。賻其家。其篤于故舊如此。客有

以息交節飲諷者。君慷慨言曰。人之所恃以生者五倫耳。如僕者。半生落魄。浮沈里巷。是求乎事君未能也。自幼子立。畏艱踣蹢。是兄弟之親未有也。有父而不獲祿養。有子而無母撫育。入宮而不見其人。是又父子夫婦之倫交闕焉。惟有朋友一倫。強以爲懽。若復禁絕之。不如無生矣。聞者心惻。可以諒其遇矣。著述懶不收拾。詢之搜輯遺篇。爲芬若樓詩文鈔若干卷。藏于家。銘曰。

豐其才。嗇其遇。畜于德。促于數。何賦畀之不均。豈造物之有誤。婁水之陽。毛市之鄉。新阡是卜。首邱毋忘。孫子瀟曰。灑灑千餘言。而無溢美。無支辭。情生文耶。文生情耶。令人增氣誼之重。

邵環林曰。對客自敘一段。悱惻動人。自是篇中最警策處。餘亦不懈而及于古。

國學生顧君墓誌銘

虞山山勢自西而來。岡巒起伏。蜿蜒走東北。而陡止。邑城鎮其趾。距城五里曰石墩。蓋山之餘氣鍾焉。其地有巨石。負土隆起成阜。故名墩。之南北有塘。二水交流。平疇千頃。居民數十家。清淑之氣。磅礴鬱積。宜有才德特立之士出其間。自宋以來。馬參謀以埋骨著。郎懶庵以隱逸稱。而其他無聞。今銘顧君。而知氣之鬱而久者。必間一發焉。按狀。顧氏于前明自錫山來徙。至君五世矣。今爲墩之巨姓。君少警敏。饒材幹。有兄愿而朴。父因命二子分理內外事。由是家之歲用出入。廩粟筭鑰。兄是職。門以外往來交際。操奇權節。審時觀物。運籌于縮贏消長者。君肩之。兢兢以治生養親爲務。而家業日隆。性儉約。不以處豐易志。自奉若寒素。而遇祭祀賓客。必潔腆。生平見義勇爲。積而能散。邑遇水旱偏災。恆樂輸恐後。道光辛卯秋。歲

熟未穫。驟遭淫潦。禾盡偃而斃。遠近數里。飢民嗷嗷。君憫之。與鄰村瞿氏。共議設粥賑之。自冬迄春。全活無算。後二年。邑有浚白茆之役。役關吳中四郡水利。工鉅費繁。君首捐千金爲之倡。大吏嘉其義行。以聞于朝。君謝不獲。歸善于親。故樂善好施之旌。榮于厥考。爰建家祠于舍傍。樹綽楔。鄉里稱孝。奉先人命伯仲同居。一門雍睦。曾無間言。迨君之子。不析產三世矣。延名師。親老成。以教諸子。常訓之曰。功名顯達。固有命在。孝弟力田。可自致也。其敦行樂道。有如此者。故諸子皆彬彬自好。樂與賢士大夫游。四方冠蓋至墩者。不問而知往君家也。君諱士銓。字廷表。曾祖行先。祖煥文。父天源。世有潛德未曜。君生于乾隆三十二年十二月九日。卒于道光二十年八月四日。春秋七十有四。國學生。議敍八品銜。例授修職郎。配王氏。繼朱氏。皆有閭德。子三。湘。國學生。嗣兄士奎後。浩。濂。皆議敍八品職銜。濂後一年卒。女三。一適國學生陳履曾。一適邑庠生周承澍。一適國學生朱宗文。孫男八。孫女一。俱幼。其孤浩卜于年月日祔葬君于嚴家角先塋之穆穴。去墩百餘步。先期以狀乞銘。銘曰。

古稱猗卓。非有殊行。徒以素封。名垂史乘。矧君蹈履。名與實應。有美弗稱。曷言論定。隆阜之陽。水匯其傍。鬱葱佳氣。是妥是藏。劬躬齋後。奕世其昌。地以人傳。墩名允彰。

朝議大夫張君行狀

曾祖士恆

祖朝績監生貤贈奉直大夫

父仁濟附貢生誥贈朝議大夫

君姓張氏諱海鵬字若雲號子瑜系出宋魏國忠獻公之後元末自閩遷虞明教諭遜志先生其六世祖也君生而穎異讀書刻意攻苦年二十一補博士弟子員三踏省闈不售遂絕意名場篤志墳素先是君考訥齋公與伯兄靜谷公皆好藏書家多宋元舊刻君治經之暇旁通子史百家言嘗慨古今載籍幾經厄刼歷觀史志所載及藏弇家所著錄存者百無一二方今典籍大備不有以聚而流傳之將日久散佚此後生讀書者之責也昔吾邑隱湖毛君以一諸生力刊經史諸書廣布海內迄今幾二百年經史舊板尙供摹印前事可師遂矢願以剗刪古書爲己任迺檢舊藏所有更廣購自明以來罕見之舊本互勘去取其中秘藏書則倩錢唐何上舍元錫從文瀾閣中寫副儲藏以備彙刊以汲古所刊經史外惟津逮秘書十五集爲書林鉅觀汰之益之黜僞崇真廣爲二十集名曰學津討原開雕於嘉慶壬戌之秋於甲子冬竣工又念六朝古籍罕存惟太平御覽中徵引頗多是一書傳而羣書之崖略以傳允稱類書之冠舊刻訛謬宗人觀察變藏有明人舊鈔据爲主本讐校再三付梓未半復從何上舍家得影宋抄本詳加覆勘已刊者不憚刊改中有兩冊爲兩抄本俱闕者復屬上舍泛海至寧波范氏天一閣中抄補是書始臻完善續又於四部中取有關經史實學名家論著而傳本將絕者梓墨海金壺七百餘卷又以其暇取明人及時賢撰述刊爲袖珍小品名借月山房彙鈔凡十六集又六年而畢流布日廣海內爭覩書林中之挾秘冊懷墜簡者爭集有未經四庫著錄者如兩京新記九國志琴川志諸書又蒐輯次第續刊書成將

名之曰金帚編。惜工始而君捐館矣。居恆嘗語人曰。藏書不如讀書。讀書不如刻書。讀書祇以爲己。刻書可以澤人。上以壽作者之精神。下以惠後來之沾溉。視區區成就一己之學業者。其道不更廣耶。其拳拳於流傳古書。至老彌篤。素志然也。君性友愛。伯兄光基暨繼嫂邵。相繼棄世。孤金吾年才十五。嫂氏臨終。付託君經理喪事畢。挈金吾反步道巷。舊宅相依。延師課讀。視同己子。釋服後。爲之授室。合葬兄嫂於寶巖新阡。遺產及一切瑣務。君親經紀之。逮金吾游庠。方以家務畀之。惟恐少負丘嫂重意。好施與。拯焚周急。宗親姻黨。贈遺無少吝。嘗同孫庶常源湘宗人觀察變陸上舍肇聖三君。仿明高忠憲遺法。立從善局。施濟四窮。月給贍養。君首捐田二十餘畝。錢千緡。爲之創。經理二十餘年。如一日。其處身也。屏絕時趨。古朴自喜。家計粗給。而自奉儉約如寒素。祭祀賓客外。不一特殺也。中歲得鄉先賢顧裕愍公省身格。力行。之。每夕省功過簿。記以自警。性好勞惡逸。黎明卽起。漏三下不息。迨黎暈役興。手一編。丹鉛左右。恆徹曉。了無倦容。延致好學知名之士。相與分校。訂訛析謬。悉心諮訪。間有不合。斷斷辨論。必洞徹無滯而後已。平生無他嗜好。蓄古人金石書畫。以供清玩。所藏敬一堂墨刻。寶硯齋印譜。遠邇爭購之。厭聲華。務實行。杜門却掃。屹屹陳編。海內名流。若孫觀察星衍洪太史亮吉皆擊舟相訪。把臂願交。觀察勞公樹棠方公體涖任。皆枉車騎過廬。君報謁外。不投一刺也。君之敦行立品。卓卓可稱道者。又如此。君精神強固。雖鬢髮早白。年及周甲。而步履猶如少壯。偶以夏月觸暑。病六日而遽不起。惜哉。君生於乾隆二十年二月十六日。卒於嘉慶二十一年閏六月初十日。年六十有二。附監生。以州同職銜。加級。授朝議大夫階。配屈氏。

贈荅人。以仲兄林基子錫三爲後。郡庠生。前卒。娶楊氏。孫一準。今名承露。廩貢生。同里黃廷鑑狀。
季崧耘曰。照曠希蹤汲古。自是足傳。文亦敘次得體。

徐翁小傳

翁姓徐氏。名涵。字有容。一字仲米。晚號竹溪。邑徐市人。明大司空棡之後也。少任俠。好技擊。里黨少年多從之。游嘗以騎射補諸生。緣事褫其衿。亦不屑也。折節讀書。從柳南王先生學詩。彈琴度曲。六法皆擅。其能以名士風流自喜。先君少時家沈市。去徐市甚近。與翁游從最密。暨先君城居。又常館郡城。跡遂疎。然翁入城時。聞先君在家必來。歲一二過。或間歲一至。余識翁時。翁年五十餘矣。及余稍長。卽先君不家。翁亦來。始以爲偶然。繼而以爲常。先君七十後家居。時屆歲暮。偶懷舊友。作書將緘寄之。未發而翁適至。皆大喜。謂我兩人之同心也。握手歡敘。并屬寫畫爲贈。明春翁來。攜畫一幅。係以詩句云。舊雨忽懷先放艇。早梅欲寄未封書。先君吟賞不置。余侍坐間。偶談西山有鵲鵲峯。而未識其處。翁曰。余熟游也。今春將應三峯僧吼琴之招。可來同遊。余遂同周子山甫。季子坤伯。往踐其約。入寺適雨。雨止偕游。林煙霏面。山翠濕衣。翁年雖老。精神矍鑠。如四十餘歲人。攜禪杖爲前導。先探白雲洞。迤邐至鵲鵲峯。又登張氏禡旗墩。而返。是夕宿山寺。余輩已困。而翁無倦容。余作紀游一篇。後係一詩。中有觀字韻。翁和云。洞口攜雲轉峯頭。指鵲鵲觀。咸歎工絕。時嘉慶四年之四月也。回憶茲游。幾三十年。而翁歸道山。亦一星終矣。翁晚歲卜居南城雲和塘上。年已八十有四。精神如舊。方幸時親杖履。訪舊聞。諮逸事。廣所未知。而是秋翁遽得疾。不

起。病中猶招余至楊前。談論如平日。并贈畫爲記。訃聞。爲之悵惘者累日。自先君歿後。親故凋零。先友之存者。惟壽君毛翁及翁爲碩果。後二年。毛翁歿。又五年而翁歿。至是而耆舊無一人焉。可哀也已。

論曰。余聞之先人曰。翁少年自負奇傑。有不可一世之概。恆欲自見其材略。卒困而無所施。退而隱居。耽詩畫。放浪山水間。非其志也。翁之畫。法倪高士。而微近浙派。不爲時人所許。而詩特清矯不俗。無綺靡怪僻之習。元和顧進士星橋。曾採其詩入停雲集。蓋翁之所託以自見者在斯。而詩品實高于畫云。同里蔣寶齡。少得翁指授詩畫。今有名。

孫子瀟曰。爲徐翁作傳。而意在耆舊之凋喪。精神全在結處。以此見文章之不苟作也。
季菴耘曰。閒雅得歐史之神。

張月霄傳

月霄名金吾。字慎旃。月霄其別字也。常熟有三張。月霄系出南張。明武邑教諭懋之後也。祖仁濟。父光基。皆邑諸生。月霄少孤。性穎敏。喜博覽。比長。學爲攷據。嘗從季父海鵬校刊太平御覽諸書。鉤稽審覈。見者稱焉。年廿二。補博士弟子員。省試一不售。卽棄去。慕鄉先輩汲古毛氏。述古錢氏遺風。篤志儲藏。與同里陳子準揆善。咸事購訪古籍。欲以撰述名當世。嘗謂歷朝總集。自文苑英華而後。文粹。文鑑。文類。代勒鴻編。惟金源氏一朝著作。自來散佚。月霄慨然引爲己任。討論史傳。網羅圖經碑刻。殫十二年之精力。成金文最百廿卷。較梅氏文紀。事艱而厥功實倍。經學莫盛於本朝。通志堂經解實集大成。顧宋元來諸家經

說。放失尙多。月霄出其家藏秘帙。復傳鈔文。瀾閣本。凡羽翼經傳者。得八十餘種。寫定詒經堂續經解。千四百三十六卷。自是先儒說經之書。彙萃無遺矣。又念藏書考鏡。賴有書目。宋之晁氏。陳氏兩家。其最善也。今則歷年既久。坊槧胥鈔代出。魯魚錯脫。踵謬襲訛。第按目取盈卷帙。藏猶不藏也。爰取所藏宋元槧本。暨新舊鈔之爲世罕見者。撰愛日精廬藏書志四十卷。爲廣其例。詳載鏤版時代。校藏姓氏。備錄舛跋。以著一書之原委。俾覽者得失瞭如。迺書目成而書散。說者謂干造物之忌云。月霄不善治生。家中落處。之泰然。鍵戶日讀經疏。撰釋冕釋弁二篇。近又取李氏易解。漢上易傳諸書。窮日夕研究。將爲窮理盡性之學。而疾不起矣。年四十三。惜哉。月霄別著廣釋名。明小學訓詁。兩漢五經博士考。補朱氏立學一門。釋龜原三代卜法。十七史引經考。及白虎通注稿。皆貫穿詳核。非經生家言也。

拙經叟曰。月霄幼從予遊。治經之暇。好觀史記。兩漢書。篝燈深夜。寒暑不輟。與之講論。今古徵典實。辨名物。退則抽書尋討。質難疊生。讀書閒舉傳注舊解。或古今異讀。輒取塾本作夾注。行間幾滿。觀其嗜書好古。趨向已早。殊俗學。厥後纂輯之宏。插架之富。十年中名滿三吳。斯真勇于自立已。及藏書既散。蕭然僻處。一編在手。而所學益漸深邃。其氣量豈出古人下哉。凡所著述。務爲其所難。實能從古籍中博觀約取而成。使天假之年。所造就當不止是。此非予之私言也。請以俟當世之讀其書而論定者。

葉震谷傳

震谷。姓葉氏。名培。祖蓁。邑諸生。震谷少學于余。質魯而性朴。家世習堪輿術。初爲童子師。後繼其業。有招

之者。不論貧富。輒爲盡力。不望報。樂善敦行。親故有緩急。視若己事。嘗爲人居間。百金。後其人沒。震谷代之價。無難色。人怪之。曰。吾自恨貧。不能周人之急。敢復負人乎。其勇于爲義。類如此。震谷三娶無子。最後妻黃氏。生一子曰柏。絕愛之。循謹無習氣。年廿餘。因喪母。暑月哀痛甚。驟得喀血疾。自夏至明年秋。百方投治不效。于道光十年冬十一月廿日夜竟死。震谷一慟。乘間自投于河。亦死。距子絕命之時。未逾刻也。哀哉。憶震谷未死之前一日。余適往省視。見余泣曰。兒命在旦夕矣。觀其容慘黯枯悴。慰之。惟以若敖之痛。深自疚責而已。震谷少余十餘歲。儀觀甚偉。年未五十。鬚髮蒼然如老翁。遭此閔凶。余固知其命之不久。然胡不令終其天年。而遽自戕之速耶。余悲其慈而愚。不忍其泯泯也。爰撮其梗概而爲之傳。拙經叟曰。父慈子孝。天地之常經也。乃經傳多言孝子而止。慈者。周文而外無稱焉。豈不以其道愚夫婦所與能。而天之生頑闇者不數耶。若震谷之以身殉子。絕人之行。於古未聞。而豈中道哉。雖然。昔西河氏親受業聖門。而喪明之過。見責曾氏。于震谷又何尤焉。又聞伊子疾亟時。謂父曰。兒不肖。以疾累親朝夕憂。罪故莫道。願親弛厥愛。釋勿憂。庶兒罪輕。疾或可爲乎。相對嗚咽。噫。有是子而天。此震谷之所以死也夫。

張駕鰲傳

余昔交唐墅譚君石麟。嘗嘖嘖稱其鄉滄溪張氏之多賢。石麟篤學君子人也。其言可信。固心儀之久矣。今夏其後嗣玉堂持厥考駕鰲君狀志求一言。余惟君之行誼孝友任卹大者狀志已詳。故論其立志奇。

卓者著之傳。君名嘉永，字海山，邑毛洪人也。少負大志，奇情逸氣，早見于鰲角時。少長，倜儻不羈，有獨立遐舉之想。年才冠，大父游武林，將泛南海祝釐，君懇隨侍。至杭，覽飛來、五雲之勝，遂渡曹娥江，涉重洋，詣小白華瞻禮而還。因喟然曰：「人生天地間，跼脊鄉里，咫聞捷見，心胸錮蔽，則靈明日汨，所負多矣。乃知古人周游博覽，皆真學問也。聞者壯之，由是名山奧區，裹糧蠟屐，輿到卽往。入天台者一，登句曲者三，所云華頂玉霄、天市地肺諸靈蹟，靡不窮覽。繼復荐先于九華，問道于雲臺，足跡所至，動輒千里。至則訪丹房，尋玉簡，遇入定之衲子，鍊真之羽流，相與講求登真度世之旨，流連不忍遽去。一日，謂其子弟曰：「吾游蹤雖廣，終不越江以南。俟向平債畢，當縱游天下，東瞻日觀，西揖巨靈，以快生平志願。」又言國初江陰有徐霞客，以布衣獨身徒步，周游四海，暮年猶窮流沙，登鷄足，歸老，號稱奇士。人貴有志耳。天假之年，何遽不若是？君時年五十矣，言此，眉飛色動，真有振衣千仞、濯足萬里之槩。遂取司空曉策六鰲句意，自號駕鰲，用堅其志。且以爲息壤也。後數年，婚嫁甫完，擬先匡廬、洞庭之游，將戒期而疾作不果。年未及耆，遽焉溘逝，惜哉！君幼讀書，略通大義，不屑爲章句之學。年二十，始發憤講求經史，惟日不足，以詩爲抒寫性情，尤好之。旣得江山之助，登臨懷古之什，詞氣豪放，惜不留稿，僅傳一二警句。今存者惟閒居寄興數章，略見一斑云。

論曰：禮有云：「男子生，設弧于門左，蓋取志在四方也。」古之賢豪，窮河源，銘燕然，立功名于萬里之外，由此志也。至儒生讀書，握三寸管，思立言于當世，亦當如太史公周覽天下，名山大川，爲文章，乃有奇氣。此豈

堪爲猥瑣齷齪。拘墟媮懦道哉。君之志雖未終。自是奇士。不然。今之戀妻孥。持籌算。自詡素封。終其身不出里門。跬步聞君之所願爲。且啞然笑矣。

邵環林曰。特表畸行。爲傳誌家開一法門。其源實自史公得來。

楊遄飛傳

君姓楊氏。名希濬。字遄飛。常熟人。父景崑。有孝行。君少孤。母程孺人以養以教。早有聞。壯歲補諸生。屢困場屋。人爲君惜之。君安于義命。泊如也。事母孝。母嘗得氣厥疾。醫不能治。君皇急。禱于邑神周孝子。夢神賜之藥。遂瘳。人咸稱孝感。母守節及年格。取陳情大吏。得早膺旌典。敦本尙義。嘗攷核宗支。刊脩譜牒。念楊氏之城居者無義塾。卽遺產卅畝。盡數捐設慶恩堂義塾。俾子姓人無失學。故里僻在西鄙。著自國初。向無紀載。君留心搜訪。著有恬莊小識。以備邑乘采擇。繼又撰輯虞邑幽光集。專搜拾邑人遺篇殘稿。姓氏翳如者。次第剗剔。以闡幽潛。今年將七十矣。杜門教授。自忘貧老。惟著書惇行是務。殆所謂篤學君子。非歟。君二子英彝。英類。咸夙慧。知著述。先後早逝。遺有海虞藝文目錄。學碑錄諸稿。君痛其未成。爲續而刊之。有裨邑中文獻。并附著之。

拙經叟曰。君世居恬莊。近始遷城。贈刑部公守默。於君爲從祖。今惠州守硯芬。其從弟也。門閭赫奕。而君家顧寒素。殆如晉之有南北阮耶。往歲。君以攷核郡志藝文見訪。始獲識君。余亦屬君尋訪邑里舊碣。相過從時。君次子英類。方以好學稱。乃越二載而遽又夭折。噫。君之遇亦窮已。余一子稍知讀書。年才二十。

病咯血亡。余方疚己之不德致是。迺以君之有道而胡重罹此戚爲君傳。又躬自悼矣。

外舅霽林周先生傳略

先生諱杏芳。字乾一。號霽林。系出周虞仲之後。世所稱東倉周氏者也。先世雄于貲。自大父時。家已中落。先生生而穎敏。少爲大母唐所鍾愛。命繼世父某爲後。及長。從陳道光先生游。兼得親司業先生講論。作爲制義。根柢經史。受知今相國石庵劉公。補諸生。再入省闈。不遇。遂棄舉子業。殫心經學。旁及子史百家。見有古帙。力不能購。躬自借錄。垂老彌篤。有邑先輩秦九塵。陸敕先之遺風焉。教授里中。翕然稱經師。年七十二卒。自余之爲先生壻也。先生年已五十矣。每見必以讀書相勗。口講指畫。提撕不倦。時先生方集注禮經。病雲莊集說之苟簡也。旁搜博采。句疏字詁。堆書盈几。丹黃並下。手一編。矻矻恆至夜分。方已。先生嘗曰。六經注解。卽在本文。潛心熟讀。精義自出。後生小子。粗能誦讀。便束高閣。故經學日荒。病在父師。不先爲之倡。習慣自然。恬不知怪。故六十後。猶日課溫經。朗朗在口。聲出几席。勤苦如童子。初就塾時。謂以言教。不若以身教也。晚歲境益屯塞。好讀莊子。謂郭注通微契妙。爲諸家之冠。成元英疏存佚未詳。不可見。欲彙輯諸家作莊子疏。草創未半。而先生疾亟矣。子二人皆前卒。嗣姪孫爲孫。所著有春秋左傳分國若干卷。禮記集解若干卷。生平所抄書籍。及雜著一篋。遺命授其弟子學博屈軼云。廷鑑曰。先生之長子繹。恂恂儒雅。能讀父書。困童子試。丁巳春。文已錄。緣誤寫題字被黜。又二年。遭時疫卒。當釋疾亟時。其妻朱割臂以療。卒不救。先生之遇。可謂窮已時。朱以舅在。義不容卽死。強自活。先生終。

殯葬畢。遽得咳血疾卒。時距先生之歿。未百日也。悲哉。

季菰耘曰。傳中述先生六經注脚。卽在本文四語。眞治經有得之言。其人足傳。而文亦生色。

王烈婦傳

烈婦李氏。昭文東鄉殷家弄人。父學山。業醫。母陶氏。年廿六。嫁同里王大江長子培基。盡婦道。培基亦善醫。結縭纔十月。以治病紛還。積勞猝遘時疫卒。婦號慟不食。誓以身殉。舅姑以婦有遺腹。曉以生男延嗣大義。親黨交勸累日。始銜哀沾水漿。及期得男。舉室相慶。名曰恆珍。婦亦自念。此後庶得撫孤代事。藉以紓死乎。迺未百日。所生子旋殤。舅姑知婦志。慮其仍萌前念。隱防護之。婦則佯笑語。陽陽如平常。月餘矣。一夕臥不起。叩之不應。急排闥視之。則用衣帶繫項貫臂。自拉死被中。體易嫁時衣服新履。時道光八年正月十三日。距夫死之日。適周一朞也。年二十有八。越歲。有司上其事。大吏以聞于朝。得膺旌典如例。里人王孝廉振聲撰著事實。余詮次之爲傳。

贊曰。古云。慷慨赴死易。從容就義難。誠哉是言也。使婦于夫殯之日。決志捐生。庸非謂烈。然此特出于悲痛之極。激以一時之血氣。猶或失之傷勇。迺能勉順舅姑之命。亦既隱忍強活。迨所願又乖。而初心不變。終一死以遂厥志。烈矣。而幾泯其迹焉。可不謂之從容蹈義哉。世之爲婦者。設不幸當此。聞烈婦之風。可以知所處矣。

曹烈女事略

曹烈女名曉芳。常熟人。父廣麟。母徐氏。幼端慧。許字同縣汪某之子某爲妻。年十四歲。父歿。童養于汪氏。逮汪氏子既長。事浪游不自好。父母屢訓不悛。忤父母意。厥父逆知其子後難改行。顧念此女淑慎。若配吾子。誤其終身。是吾罪也。遂屬媒氏。婉告其母。願辭婚。俾別擇佳配。母諾之。遂假疾命女歸省。比到家。迺知此言。女卽以死自誓。母間以微言勸之。輒曰。一家女受兩家茶。兒死不願也。母不復強。始安之。佐母以針黹自活。居數歲。有戚朱憫女少而賢。願爲媒。私勸母復許。字羊尖朱氏。旣擇吉。議受聘于舅氏家。不令女知也。屆期。母託故言歸。有鄰姆洩其事于女。是日。朱氏之聘未反。有人踉蹌奔告曰。女自經死矣。母哭歸。尸尙溫也。年二十有四。時在道光十五年八月十三日也。

烈女家與余家同住鎮海門。相去隔一城關。早聞其事。去冬。復親訪其鄰里。得悉其實。靡它之操。迺出自蓬簞孤女。尤人所難也。不揣譾陋。敍其事略如右。伏冀大人先生。賜之贊誄詩歌。闡揚貞烈。用光泉壤。且以竚旌門之典焉。

練塘張孝女傳

孝女姓張氏。名某。字足貞。常熟練塘人。太學清季女也。生十歲。喪父。哀慟如成人。性明慧。比長。奉孀母朱。循定省。佐饋食。深得堂上歡。暇則以針黹課其女姪輩。樂取內則及古來烈女事迹。爲之講解。母中年體患濕疾。不良於行。女扶掖左右。不離跬步者十餘年。如一日。迨母踰七十。兩足痿躄。時呻吟牀蓐。女奉晨昏。凡飲食涼燠之宜。疴癢抑搔之節。一切先意承志。中裏廁牕。必躬洗滌。不假婢媼。經年疾不可爲。女竊

念世稱割股可起危疾。一夕遂私割臂肉以進。秘不告人。越日。嫗見衣有血污。察之。右臂裏有創痕。始吐其情。既進不效。女自咎己誠不至。泣告兩兄曰。兄持門戶。繼宗祧。所繫者大。妹女子可以無生。願以身代母矣。止之不可。默擇日齋沐。夜半匍匐中庭。籲天請命。兩兄知之。趨至叩頭掖之起。內外咸嘆其誠至。謂母病常自瘳也。無何。母竟不起。女一慟幾絕。三日不食。諸叔暨戚長咸相勸。始沾水漿。曰。吾姑少緩須臾死耳。朝夕奠則號慟不已。自初喪至三月之末。慘愴之情。侘傺之色。未嘗一日稍弛於面。日啜粥一二盂。或竟不食。形羸肌削。漸不可支。兄嫂強以藥餌。則對曰。吾方以速死爲幸。奚藥爲。兄慰之曰。先王制禮。毀不滅性。故哀痛之情。因時而殺。今母亡已閱歲時。而妹終一心矢死不變。何耶。女泣對曰。母疾亟時。曾瀝誠籲天。以身代母死。不效。則誓不獨生。兄所知也。今不幸親亡。忍自食其言乎。所以不卽死者。恐傷兩兄之心。且不欲借親死爲名也。聞者咸歎泣下。病日劇。逾月卒。時道光九年三月一日也。年三十有二。黃子曰。孝根天性。丈夫女子一也。無分地位。朱門蓬戶等也。故當世割股祈死。冀延親算者。雖閭巷婦女。多勉爲之。卽非中道。其志誠可悲已。至於割股不效。繼以身代。卒不效。而終以身死。此事之所尤難者。亦足以風世矣。孝女爲余門人陳大森妻女弟。來述其詳。故詮次其言而爲之傳。

姚母陳宜人傳略

宜人姓陳氏。父應鐘。國學生。本海虞望族。宜人生而淑順。嫻姆教。誦女箴。年二十。適同里布政司理問銜姚廷輝。事舅姑以孝。相夫子以禮。嫁七年未孕。謂夫曰。舅姑年邁。孫枝未續。盍置簪以慰堂上心乎。有子。

吾子也。請諸舅姑。納妾貝氏。暨吳氏。生女四。最後生子文壙。吳出也。文壙生兩月而舅亡。甫七月而夫亡。常是時。宜人以一婦人支持門戶。四女未字。藐孤在繯。綵綵子立。詩稱捋荼集蓼。莫喻艱辛已。舅之先。兄弟三人。舅以勤儉克家。資稍裕。宜人念古之人克保先業而延宗脈者。咸先敦本厚俗。爰割遺田三百畝。手授諸姪曰。若知吾舅吾夫之業。悉出先人舊德乎。自先人而視吾子與諸姪。皆孫子也。敢忍私己。負郭數頃。願共守之。勿爲他人有也。姪六人曰。錫範者。好讀書。早歲補諸生。且年又長。藉以庀內外事。優給其半。而以半分授餘子。溥惠中隆殺以義。有如此。先是有許姓以鄰屋相售。葺而周垣。有借門首節坊。構訟者。迨舅夫繼歿。訟未息。宜人慨然曰。妾今日身處縻惻。彼兩節婦者。吾師也。焉用爭爲。願將斯屋立雙節專祠。俾俎豆其中。爲許氏世守。用申景慕而弭訟端。當事嘉而許之。其居恆捫撝家務。達理裁義。類又如此。廿年中。經營區畫。葬舅夫于新阡。四女嬪士族。爲文壙授室。未遑一日逸也。及疾。命其子曰。吾年逾四十而寡。守分耳。汝生母年廿二而鞠汝。自孩抱至今二十餘年。以年例有待。尙未請旌曲。又向慕高平。瞻族之義。辛勤節縮。俟稍羨盈。方圖經始。今疾不可爲矣。二者我未竟之志也。汝其勉之。言訖而沒。年六十有七。

論曰。易云。訟則終凶。禮云。積而能散。斯二語。士大夫或讀而昧之。况巾幗乎。自女行不脩。俗尙爭而不讓。肇閱牆紛角雀。有馴至覆宗而不悔者。揆厥禍始。多由婦德之虧而滋釁焉。若宜人者。可以風矣。

朱孺人誄辭

孺人朱氏。余妻弟周繹之配也。父立芳。廩膳生。年十八喪母。踰年歸于繹。時姑嚴夫人已前歿。舅卽謁林先生也。先生年踰六袞。多病。繹館于外。間歸定省。賴孺人旦夕侍奉。凡飲食衣服寒燠之節。逮抑搔洗沐之細。無不先意順承。調護備至。暇勤針黹以佐甘旨。嘉慶己未冬。繹遭時疫。孺人病才愈。見繹病亟。割臂肉以療。卒不救。孺人痛絕者再。勉起摒擋。強自活。自繹亡後。以婦代子。奉養益謹。先生嘗曰。使吾相忘于菴獨之苦者。賴此孝婦也。又六年。先生歿。踰月。葬先生于寶巖之新阡。先葬三日。孺人忽得咯血疾。力疾送葬歸。益殆。遍召族黨處分後事。越三日。遂卒。時距先生之終未百日也。哀哉。繹無子。先生在時。嗣從弟德堃子某爲繹後。女一。殤。辭曰。禮經有言。事舅如父。降自三代。人情非古。孝衰妻孥。詎許乖沴。男子且然。何況婦女。賢哉孺人。閨中砥柱。堂有衰翁。夫死誰主。養舅妾分。速死奚補。銜悲強活。痛踰割股。寒煦暑清。扶偃持僂。饌潔嘉蔬。尊盈醴醕。翁顏開口。妾枕如雨。星回六祀。蓼集荼茹。烏哺終天。馬鬣封土。烈以孝遲。殉先身許。激死匪名。從容蹈矩。旌揚宜亟。幽光昭宇。

龐氏孝愍三婦誄 井序

三婦者。何太學生龐德輝妻錢氏。暨兩子婦聯奎妻徐氏。宿奎妻錢氏也。曷云孝。德輝與二子俱出。夜室不戒於火。姑入火抱栗主出。兩婦亦入火急救其姑也。其愍也何。火熾烟騰。牽曳顛踣。姑與二婦一時并斃也。哀哉。時嘉慶庚午十一月事也。攷之主以棲神。事亡如存。禮也。財蓄可棄。首護栗主。非深明于孝道者不能。爲子婦者。見姑之蹈火而奮身以救。胥出至性之固然。使天心佑善。祝融雖虐。俾姑婦灼肌焦髮。

卒蹈危地而存。各得所願。其孝庸可謂不至。不幸志與願違。與主俱罹其酷。是豈當日姑婦之初心哉。尤可哀已。同里王太史家。相作傳詳其事。賢有司暨鄉之士大夫。咸爲歌詩。以彰奇行。大吏上其事于朝。命下。以孝婦旌其門。俎豆于鄉。死而不死。亦可以無憾矣。某更援唐李翱氏書高愍女碑之例。稱以孝感。而係之以誅。辭曰。孝爲庸德。惟奇斯顯。乘彝攸賦。婦女同踐。行蹈其常。境遭其變。叶玉爐珠灰。哀茲婉孌。鹿門三孝。咸稟淑質。一旦禍起。夫子夜出。鄰舍火焚。延及寢室。姑曰急矣。首護主栗。二息奔救。墮火俱滅。嗟哉婦道。以順爲首。家有急難。豈容袖手。矧茲烈火。勢出拉朽。抱主出險。庶安我舅。烈燄方揚。融風肆赫。奮不顧軀。心在全祐。慘媿李娥。痛猶賈栢。李賈事見太平御覽。皆以殉火死孝者。奇孝罕聞。于今猶昔。人謂天夢。余曰否否。數由前定。性稟所受。皇仁褒孝。綽楔永壽。言之心怛。聽者色愀。嗚呼哀哉。龐氏三婦。

先大父紫霞公家傳

公諱鶴。字漢昇。號紫霞。性磊落。幼有大志。發憤讀書。傾囊購書史。耽吟咏。弱冠游京師。欲以詩歌鳴當世。嘗走山海關。抵盛京。寓正宗寺。二載。會成峨石中丞撫江右。出都。見公詩。傾賞之。遂延之幕中。誨其二子。未一載。亟歸省親。時曾大父襄卿公。曾大母馮孺人俱年老。遂決意侍養。絕跡遠游。旣中丞屢以書招之。不出。答詩有失期已驗姓名間。黃鶴從來去不還。莫道野人同鹿豕。只緣日影薄西山之句。其品行概可知矣。客游歸。家日益落。爲桐子師。溷迹江鄉。嗜飲。時與二三知己。酣醉淋漓。歌吟自適。以抒其抑鬱。後數年。得歐血疾卒。年四十有四。詩在眉山。劍南之間。生平篇什甚富。歿後散佚已半。其存者有自娛集。秋風

集寄廬詩鈔配祖母葉孺人後公四十年卒子三長伯父鎮仲爲本生父坤繼舅氏後季卽嗣考叔燦孫男廷鑑拜述小門人陳本淳填諱

先考牧村府君行略

府君諱叔燦字金臺號牧村先世自新安遷虞世以孝行稱至六世爲大父漢昇公生三子長伯父金山公諱鎮次會春公諱坤出繼舅氏後姓葉廷鑑本生父也季卽府君年十六失怙爲童子師少得脩脯以供饘粥發憤習舉子業力不能從師從書攤上買時文一二冊晝夜誦讀得題依仿爲之間出以示人老宿見之驚歎以爲天然合度不煩繩尺年廿五受知于學使祭酒崔公補博士弟子員乾隆壬午乙酉鑾輿兩巡江浙學使廷尉鶴峯李公拔江蘇英俊之士獻賦行在府君與焉膺召試者再皆不遇李公深加惋惜俾肄業紫陽書院時長洲沈宗伯歸愚先生主講席三吳名士咸萃其門如褚篤心吳白華樓堂昆仲顧星橋諸君皆把臂願交一時掉鞅文壇名噪吳下宗伯深器之自丁卯至庚子屢躋省闈辛丑丁大母艱遂絕意功名晚歲酷嗜養生之術參同內景多所研究恆終日兀坐如空山老衲嘉慶丙寅距府君游庠之歲恰周花甲邑之士大夫咸請府君重游泮宮爲昇平盛事未及試期而府君先卒士林咸惜之府君性至孝奉大母葉孺人能得其歡心家貧客授郡城屬吾母季孺人以代子職歲時歸省入子舍依依孺慕不忍出門大母病篤嘗夜半叩天願減己算以代逮大母卒壽八十有七府君年已六十擗踊哀

進尤長于賦。生平應試之作。久膾炙人口。著有籟鳴詩鈔五卷。賦鈔一卷。府君生于康熙壬寅三月十六日。卒于嘉慶丙寅二月二日。年八十有五。以是歲冬窆于舜過井之新阡。配吾母季孺人。先府君卒。子一人。卽廷鑑也。男廷鑑百拜謹述。小門生張金吾填諱。

先妣季太孺人傳略

孺人姓季氏。出文村世族。郡諸生大木公之女也。先大父紫霞公。與外大父以詩酒相契。遂締姻焉。年十三。以童養迎歸。先大父旋棄世。吾父年十五。下有弟妹。甫離襁褓。貧無立錫。饔飧半出十指下。先大母葉太孺人。待子婦嚴。孺人勞而無怨焉。逮丙寅歲。吾父遊庠。脩脯所入。差給饘粥。孺人猶日勤織紉相助。既吾父入紫陽書院肄業。羈迹郡城。孺人代供子職。色養交至。二十餘年如一日。俾吾父無內顧憂。壬辰秋。大母年七十八矣。患劇痢。吾父與吾母涕泣籲禱。奉侍湯藥。親滌廁穢。不解帶者三月。竟獲痊。後十年後。患痢愈。又膺痲疾。遂不起。時乾隆辛丑之九月也。孺人先已亟遣人馳報吾父。比至而大母先考終。孺人含哀摒擋棺槨衣衾都具。專待含殮矣。其孝于姑者如此。外大父中年喪子。外大母陳孺人先卒。繼娶張氏。目瞽。遂依吾母居住。養贍終身。及卒。殯葬之費。皆吾母力任之。其厚于外家者如此。性好義。能濟人之急。鄰有婦獨居被竊。夫歸無禦寒具。將笞之。其妻悲欲自經。孺人聞之。默以錢資之。又鄰有夫被繫急求貸。孺人脫簪釧質之。人咸謂必負。孺人泰然。後逾年。其夫獲釋。竟償還。凡戚里有貧乏者。不惜損己以

相助。自吾父客授于外。又稚小。孺人支持門戶。一切親朋交際。經理秩如。而教小子也。慈而嚴。自就傳以逮成童。孺人實以母道兼父道焉。顧性愚氣惰。不能仰副吾母之望。何痛如之。憶己酉冬。應邑試。爲山右裴公所首拔。孺人爲之色喜。孰意明春玉峯試歸。而孺人已膺疾不起矣。孺人身弱而好勞。多病而自忘其病。由是病益深而體益憊。六十後。屢膺重疾。稍沾飲食。卽強起操作如故。其性不喜一日耽逸也。嗚呼痛哉。孺人生於康熙辛丑十一月初三日。卒于乾隆庚戌五月初七日。享年七十歲。於壬子冬卜葬于北山舜過井之新阡。不肖子哀痛之餘。詮次一二。挂漏實多。聊以示我後人云爾。

亡室周孺人傳略

孺人姓周氏。同邑文學藹林先生次女也。年二十二。歸于我。性和淑寡言笑。略識文字。閨中恆以讀書相勗。不事容飾。蒿簪布裙。佐中饋。操作悉中節。當孺人之來歸也。在乾隆己巳之夏。以吾母季太孺人寢疾。侍奉無人。吾父擇吉迎歸。而吾母病適愈。贊見後。吾父見孺人端莊閑雅。喜謂曰。兒得佳婦。汝母可少慰。吾在外心安矣。其秋九月。太孺人又患時感。孺人才歸寧。聞信卽趨歸。晝夜偕侍湯藥。不解帶者匝月。迨吾母病愈。而孺人旋患三瘡。越歲始已。由是體弱。而恆強自作勞。值歲大祲。斗米六百。脩脯入不繼。孺人甞勉有亡。佐以十指。雖麥食藜羹。華門之內。姑婦兩人怡如也。明年。孺人以身妊患腫。體益憊。遂瘠產難卒。爲丁未秋七月二十日也。年二十四。哀哉。孺人之爲婦日淺。非有行實可紀。粗述梗槩。用誌勿忘云。

